

Pia Valär inaugurescha l'atelier d'artists a Beirut

■ (Ir) La Lia Rumantscha (LR) metta a disposiziun ensemen cun l'ambassada svizra a Beirut in atelier d'artists en la chapitala libanaisa. L'illustratura Pia Valär da Zuoz visita l'atelier sco emprima artista. Sin empustaziun trametta ella sias ovras d'art sco cartas postalas. En il temp da las medias socialas èn ils salids da las vacanzas svelts tramess. Pertge betg scriver puspè ina giada ina carta postala? Tgi n'ha betg plaschair da survegnir posta? Betg quella electronica, mabain quella fisica ch'ins prenda or da la chascha da brevs, la surpraisa tranter ils quints e la reclama: in salid dal lontan. Questa furma da la comunicaziun lascha l'illustratura *Pia Valär* da Zuoz puspè reviver.

Impressiuns sin empustaziun

Durant in mais rimna Valär impressiuns da la citad multiculturala da Beirut e las disegna sin cartas postalas. A las pitschnas ovras d'art dat ella ina «legenda» rumantscha – ina reflexiun da la scena fixada sin palpieri a basa da sia identitad culturala e damai era rumantscha. Las illustraziuns vegnan preschentadas durant ses segiurn en in'exposiziun a Beirut e pli tard er en il Grischun. Las cartas postalas illustradas pon ins empustar tar Pia Valär avant e schizunt anc durant ses segiurn il zercladur da quest onn e laschar trametter ad in adressat tenor giavisch. Mintga carta postala è in original.



FOTO C. CADRUVI

Pia Valär

Art rumantsch a Beirut

Il segiurn en la citad plurilingua da Beirut dat a las artistas ed als artists nov spazi per reflectar davart l'atgna lingua. Inscunters cun artistas e docents libanais da la sparta d'art respectiva permettan in barat cultural e professiunal. Grazia a la collavuraziun cun l'ambassada svizra èsi pussaivel da crear contacts gia avant il segiurn en l'atelier.

Quest onn passentan suenter Pia Valär anc dus auters artists in segiurn en l'atelier. Latun lavura la grappa da teater cun *Anniina Sedláček*, *Anna Mengiardi* e *Marina Blumenthal* e l'enviern il fotograf *Donat Caduff*

en l'atelier d'artists a Beirut vi da lur projects. Tut ils projects han ina relaziun cun la lingua e cultura rumantscha. Ils segiurns d'atelier 2017 vegnan publicgads l'atun da quest onn.

Per empustar cartas postalas illustradas da Pia Valär: pia@valaer.ch / pretsch per exemplar: 20.– francs / mintga carta postala è in original. Detagls davart l'empustaziun: www.pia.valaer.ch



Cartulina cun dissegn original creada da l'illustratura Pia Valär.

MAD

Curt e bun

Pia Valär (*1983) da Zuoz ha frequentà il curs preliminar d'art da la Farbmühle Lucerna, ha absolvi silsuenter l'Edinburgh College of Art (BA Hons Illustration, 2013) e lavura dapi lura sco illu-

stratura libra. Ella ha dissegnà tranter auter per carnets da program e cudeschs illustrads. L'onn 2015 ha Pia Valär survegni il Premi da promoziun dal chantun Grischun. Ella viva e lavura a Turitg.